



14. februar 2023

UPA 2023/163

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Ikiaroorartunik sakkortuunik eqqusseriartunut, tuniniaasunullu pineqaatissiisarnerup sakkortunerulernissaa pillugu Naalakkersuisut 2023 naatinnagu Naalagaaffimmut saaffiginnissuteqarnissaannik Inatsisartut aalajangiiffissaattut siunnersuut.

(Inatsisartuni ilaasortaq Aqqalu C. Jerimiassen, Atassut)

Tunggavilersuut

Qallivoq mittarsiffuaqalernissarput Nuummi Ilulissanilu, taamattaarlu Qaqortumi mittarfissaq sananeqarluni. Malitsigisaanik aarleqqutigisinnaavarput, naammassineqariarpata nunatsinnut sunniutaasinnaasut arlalippassuit. Ilaatigut ikiaroorniutinik sakkortunerusunik eqqussuisoqartaleratarsinnaanera.

Tamannalu annertoqisumik akiorniartariaqarparput sapinngisaq tamaat. Tamassumallu pissutissaqarlualersippaatigut, Naalagaaffiup oqartussaasui Naalakkersuisullu suleqatigiillutik ikiaroorniutinik sakkortuunik eqqusseriartoqarsimatillugu, eqqusseriartut eqqusseriarnermilu suleqataasut pineqaatissinneqartarnerisa sukateriffigineqartariaqarnerat.

Inuiaqatigiit taamak ikitsigitilluta, ikiaroorniutit sakkortuut ilaatigut tusarsaajartulerfianni pissutsit isiginnaaginnarsinnaanngilagut, sukanerinissamut piffissanngorpoq. Inuiaqatigiinni ajornartorsiutaaleratarsinnaasooq pinaversaartilluinnartariaqarparput.

Uani Island assersuutissaqqippoq. Islandimi imingassamik atuisut milliartornerat kusanartorsuurtut avammut ersarissartaqaat, taamaattorli kisitsisit tunuarni toqqoqqasut avaanngunarsinnaasuttaaq paasisassarsiorluni angalanermi ilaatigut saqqummiunneqartarput. Assersuutingalugu, inuit atungaartuussuutsikkut qaffakiartornerisa malitsigisaannik ikiaroornummik kokainimik atuineq qaffariaateqarsimaqisortaaq taaneqarluni.

Uagut tamanna aqqut tikinnersaarluinnartariaqarparput! Eqqussiniarsarisunullu avaarsaanissamik siunertaqarluta, pineqaatissiisarneq annertuumik sukateriffiginissaanut piumassuseqartariaqarpugut, inuiaqatigut illersorsinnaajumallugit.

Politiit qisuariapallassinnaanikkut, arsaarinnissuteqarsinnaanikkut pasitsaassaminnullu ajornanninnerusumik qulaajaallutik misissuiartorsinnaatitaanissaat angusariaqarpoq, tunggaviusumik inatsisit naalagaaffimmi atuuttut unioqqutinngikkaluarlugit.

Taamatut saqqummiussaqaarlunga, neriuutingaara inatsisartoqatit naalakkersuisullumi uani eqqartukkami suleqatigiiffeqarnissatsinnut ujartueqatigiissinnaajumaartugut.



Aningaasatigut ingerlatsinikkullu pisortanut kingunerisassai:

Ukiup affaata naalanik allaffissornikkut Naalagaaffimmullu saaffiginnissamut AC Fuldmægtigep suliaqartinneqarnissaa naatsorsuutigineqassaaq. Tamannalu 250.000kr-mik missaanik naleqassaaq.

Namminersortunut aningaasarsiornikkut allaffissornikkullu kingunerisassai:

Soqanngilaq.

Innuttaasunut aningaasarsiornikkut allaffissornikkullu kingunerisassai:

Soqanngilaq.